

## CLXII

**1330-XII-8, Sevilla. Carta abierta de Alfonso XI al concejo de Murcia, liberándolo del pago de 2.500 maravedis pertenecientes a los vasallos de don Juan Manuel. (A.M.M. C.R. 1314-1344, f. 55 r-v).**

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de Murçia, salut et gracia.

Sepades que Diego Martinez de Ferrerueta et Pero Gras, vuestros mandaderos que enbiastes a mi, me dexieron que por grant mester que ouiestes dineros para escuchas et atalayas et atajadores et otras cosas para guardar mio seruicio et poner recabdo y en la çibdat, que tomarades dos mill et quinientos maravedis de los esquilmos de los heredamientos et bienes de los vasallos et acostados de don Johan, fijo del infante don Manuel, que andauan fuera de Murçia, et que los auia des tomado et espendido en mio seruicio, segunt sobredicho es, ante que Andres Perez, mio portero, llegase con la mi carta postremera que uos yo enbie, en que uos enbie mandar que los desenbargasedes. Et que me pediades merçed que touiese por bien de uos los quitar.

Et yo touelo por bien et quitouoslos et do uos por libres et por quitos destes dichos dos mill et quinientos maravedis, pues los tomastes para mio seruicio, et que los non pechedes.

Et desto uos mando dar esta carta seellada con mio seello.

Dada en Seuilla, VIII<sup>o</sup> dias de dezienbre, era de mill et trezientos et sesenta et ocho annos. Yo, Diego Perez, de la camara, la fiz escreuir por mandado del rey. Alfonso Gonzalez, vista. Pedro Alfonso, registro.

## CLXIII

**1330-XII-8, Sevilla. Provisión real de Alfonso XI al concejo de Alcaraz, ordenándole respetar la franquicia a los vecinos de Murcia. (A.M.M. C.R. 1314-1344, f. 57 r).**

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo et a los alcalles et al alguazil de Alcaraz o a qual-

